

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. DATO' FAUZI BIN ABDUL RAHMAN
(INDERA MAHKOTA)**

PERTANYAAN : LISAN

TARIKH : 18.06.2014

Y.B. DATO' FAUZI BIN ABDUL RAHMAN [INDERA MAHKOTA] minta **MENTERI KEWANGAN** menyatakan apakah dasar Kementerian berkenaan tawaran tender terpilih (*selected tender*) oleh kerana kaedah sedemikian terdedah kepada penyelewengan. Apakah Kementerian bersedia untuk menghentikan amalan tawaran terpilih (*selected tender*) ini.

JAWAPAN

Kerajaan sentiasa menekankan supaya semua perolehan Kerajaan dilaksanakan secara kaedah tender bagi meningkatkan tahap ketelusan

dalam proses perolehan dan memperkuuh daya saing serta bina upaya syarikat tempatan. Perolehan secara tender merangkumi tender terbuka, tender pra-kelayakan dan tender terhad.

Bagi projek yang dipelawa secara tender terhad, Kementerian/Badan Berkanun dibenarkan untuk melaksanakan perolehan tersebut bagi projek-projek yang memerlukan kepakaran bernilai tidak melebihi RM10 juta. Ini ditetapkan dalam Perenggan 11, Surat Pekeliling Perbendaharaan (SPP) Bil. 9 Tahun 2009 mengenai Had Nilai, Kuasa Dan Tanggungjawab Lembaga Perolehan Agensi. Melalui kaedah perolehan secara tender terhad ini, masih wujud persaingan di mana tawaran-tawaran petender akan melalui proses penilaian yang sama seperti tender terbuka bagi memastikan tawaran terbaik dan paling menguntungkan dipilih.

Pemilihan syarikat untuk tender terhad dibuat berdasarkan kepada keupayaan syarikat, prestasi/trek rekod, kedudukan kewangan, beban kerja semasa syarikat serta lain-lain kriteria yang bersesuaian. Setelah mengambil kira kriteria-kriteria yang ditetapkan, pihak berkuasa melulus sama ada Lembaga Perolehan 'A' Agensi atau Kementerian Kewangan

boleh untuk tidak bersetuju dengan senarai syarikat yang dikemukakan dan meminta Agensi mengemukakan senarai syarikat yang baru untuk pertimbangan semula.

Di samping itu, pihak berkuasa melulus juga boleh menolak pelaksanaan perolehan secara kaedah tender terhad dan mengesyorkan Agensi melaksanakan perolehan secara tender terbuka. Setelah keputusan pemilihan untuk tender terhad diputuskan oleh Lembaga Perolehan 'A' Agensi atau Kementerian Kewangan, Agensi akan menghantar surat pelawaan menyertai tender terhad kepada syarikat-syarikat yang dipilih.